

Walumi

¹ O Paulo, otumwi owa Yesu Kilisiti, yakwiziwe abhe tumi, nabagulwe hu ndommebelelo ezya Ngolobhe. ² Eene yayela endombebelelo ya yiyanjile huhale ashilile hwakuwa bhakwe hunsimbo enza. ³ Huje Omwana wakwe, yapepwe afumehushi kholo sha Daudi hwidala lwembile. ⁴ Omwene atangaziwe aje Mwana wa Ngolobhe hunguvu Ofijili omwinza hu zyohe olwabhafwe, uYesu oKilisiti Ogosi wetu. ⁵ Ashilile omwene tambilile owene netumi ezyeshishi enyinda hwabhala bhasebha puta bhoti hwitawa lyakwe. ⁶ Huje bhasebhaputa ebha, namwe nantele mukwiziwe abhe bha Yesu Kilisiti. ⁷ Ebaluwa ene eli hwa bhantu bhonti bhabhali hu Lumi, aganwe no Ngolobhe, bhakwiziwe abhe wene ewene ebhehulimwe. Nowiza afume ha Ngolobhe Obaba wetu Ogosi oYesu Kilisiti. ⁸ Nantele, ehesovya Ongolobhe wane ashilile oYesu Kilisiti hulimwe mweti hubhe owinza wenyu, enongwa ziyangwa esi yoti. ⁹ Nantele Ongolobhe shaidi wane, wehubhe mbela hu mwoyo gwane hu ndombebelelo zya Mwana wakwe she dela abhasumule. ¹⁰ Nantele elabha huje emputo zyane aje hwidala lwalwoti emanye omwisho wakwe abhe namiji eshi hulugano olwa Ngolobhe abheze bhenyu. ¹¹ Nantele esongwa abhalole, nkembapele nashi amwenyubha bhonti endole syo ezyefijili emanye abhakhazyeshinza. ¹² Yani, ehwenyezye azizwe omwoyo mwenti namwe

hunyiza ezya weka owetu, agenyu nagalini. ¹³ Eshi mwaholo, sagehwanza mukose amanye aje, hinji ede njela ahwenze hulimwi, lakini ezijilwe nantele eshi ananzaga aje mubhenama dondolo hulimwena shisehweli hwa bhantu bha sebhaputa. ¹⁴ Edaiwa na Yunani na jenyi nantele, na sovunalema. ¹⁵ Huje hulini, ane endihani ayanje endombelelo hulimwe mwali hu Loma. ¹⁶ Nantele saga enzilelela esoni edombelelo huje uwezo wa Ngolobhe wauta owaule hwa yayoti yahweteha, ha Muyahudi kwanza na kwa Muyunani nantele. ¹⁷ Nantele enyiza zyazyonti ezya Ngolobhe zibhoneshe afume hunyinda nenyiza, "Owenyiza adela hunyiza." ¹⁸ Nantele ilyoyo elya Ngolobhe lilipazelu afume humwanya humbibhi ba bhibhi woti owatu, waufisa eyoli. ¹⁹ Ene huje goti gagali gabho neha hwa Ngolobhe galipazelu hwa bhena huje Ongolobhe abha lanjile. ²⁰ Huje enongwa zyakwe ziganje abhoneshe shinza gali pazelu ahwande sayabhombwelwe esi. Gabhonehana ashilile huvitu huvitu vyavibhombwelwe. Enongwa ezi zili hunguvu zyakwe ezye siku zyoti asili eyeshi ngolobhe. Afume hwakwe, abhutu ebha sagabhaulwe. ²¹ Ene huje, hata bhamenye huje Ongolobhe, subhatutumuye aje Ngolobhe, nantele sagabhapiye ensalifyo. Nantele aje bhali bhapambafu ashele husebho zyabho, na moyo gabho agheshilema gali mukisi. ²² Bhahwibhushele aje bhasovu, nantele bha bhalema. ²³ Bhagalu zenye otuntu musu wa Ngolobhe asagali mamabhibhi nashi hushifwani esha bhantu bhabhali nembibhi, nashi enyonyi ehanu zyazili nama-

gaya gane evya mwabho evibhombe vyavijendala evyanda. ²⁴ Nantele Ongolobhi abhaleshile bhalondole idala elwe nyonyo zya moyo gabho hu chafu, humbele yabho hu gakenyesya hwa mwabho. ²⁵ Bhebho bhaigaluzenye elyoli ya Ngolobhe abhelilenga. Lyabhaliputanga navi tumishile elanganyo bhaleshile Yabhombi, yasombwa esikuzyonti. Amina. ²⁶ Nantele eshi, Ongolobhe abhaleshile bhalondole enyonyo zya bho ezye nsoni, hwahubhe abhashe bhabho bhagalulenye amabhombelo gabho ageshikulilo gala gagaloleha shinguga neshikulile. ²⁷ Bhope, alume nantele bhaleshile embumbelo ezyeshi kulilo hwa bhashe nabhene nyonyo zya bho bhene. Ebha bhali bhalume bhabha bhombile nalume amwabho gaseganaziwaga, na bhabha hambilila evisyo zyazya hanzilwe humbibhi zya bho. ²⁸ Nantele bhakhanile abhe no Ngolobhe hunjele zya bho, abhale shila bhale hunjele zya bho, hwanziwa azibhombele embombo zila zyasezi hwanziwa. ²⁹ Bhamemile embibhi bhoti, obhibhi, ne nyonyo no bhibhi. Bhamemile wivu, ogoji, ibho, akhopele na husebhele embibhi. ³⁰ Bhope nantele bhanalibho, abhomezi, navililwe Ongolobhi. Bhali na vulungu, neshi bhuli, nahwivune. Abhene bhahwada amabhibhi bhase bhaneshishi hwaisebhabho. ³¹ Abhene sagabhali nenjele; bhasebha hwaminihwa, sehanaminza ageshikulilo sagali bhali nensajilo. ³² Bhahwelewa ekanuni ezya Ngolobhi, nantele aje abhatu bhabhomba nashiego bhahwanziwa afwe nantele saga bhabhomba ego. Abhene bhahwetehana na bhala bhabha bhomba em-

bombo ezwo.

Ulyango 2

¹ Nantele sagauhwiuzizye, awe wologa eshi hwagala golonga owenje ahwibheshele mnyobho mnyabho mwene. Huje awe wolonga obhomba enongwa zizila. ² Nantele timenye huje olonzi owa Ngolobhe welyoli hwa bhala bhabha bhomba aminza gabho. ³ Eshi awe sebha eli wolongo bhala bhabha bhomba enongwa nashi ezye nawe obhomba embombo zyezyo. Eshi obhohwiyefwe hulonzi wa Ngolobhe? ⁴ Huje osebha hashesana huwiji we winza wakwe, akhabhile humayemba gakwe naji mbizye hwakwe? Eshi saga omenye aje owinza wakwe uhwanzi wa hulanganyizye hu ndambo? ⁵ Nantele shohweli okhome wemwoyo gwaho ogaje lole edambo ohibhishela wewe eshanga eshemayemba hwisikulila elyemaye mba, nantele, isiku lila elye kwinkule owelenzi owelyoli wa Ngolobhe. ⁶ Omwene aihuposhezya kila mtu eshipimilo eshalengane ne mbombo zyakwe: ⁷ hwa bhala bhabhali lyoli hu mbombo enyenza nanganyishe bhaibhapela owomi wewilawila. ⁸ Nantele hwabhala bhali bhene, bhaseyogopa elyoli nantele bhayogopa ezuluma, ilyoyo nekuni ehali ehainya. ⁹ Ongolobhe aitaleta etabu na malabha hu kila nafusi zya bhatu yabhombila amabhibhi, hwa Muyahudi owahwande no Muyunani nantele. ¹⁰ Eshi ensombo, neshishi no winza waihwenda kwa shila mtu yabhomba enyenza, hwa Muyahudi hwande na hwa Muyunani

nantele. ¹¹ Huje nahumo apendelele hwa Ngolobhe. ¹² Huje nashi abhinji bhabhalulila pasepali ne shelia bhanzateje pasepali ne shelia, nantele nashi abhinji bhabhatulile alengane ne shelia bhailongwa hu shelia. ¹³ Huje sebhahovwa edajizyo bhali nelyoli hwitagalila lwa Ngolobhe, nantele bhabhala bhabhaibhomba edajizyo bhaibhaziwa hu haki. ¹⁴ Huje abhatu bhase Bhaputa bhaseli nedajizyo, bhabhomba hushikalilo embombo ezye ndajizyo zyangho, bhagalushe ndajizyo humoyo gabho, nantele abhene sagabhali nedajizyo. ¹⁵ Hweli balolesya aje embombo zyazi hwanziwa hu mijibu owe ndajizyo zisimbwilwe muhati mmoyo gabho. Ezamili zyangho zisumula aje, ne jele zyangho bhibho aje bhashitakiwa au zibhalinda abhene bhebho ¹⁶ nantele hwa Ngolobhe. Ega gafumila hwi siku elya Ongolobhe paizilonga esili ezya bhatu bhoti, sawasawa nedombebelelo zyane, hwi tawa elya Yesu Kilisiti. ¹⁷ Tiyanje aje ohwikwizya wewe Muyahudi, yakheye yu dajizyo, shima ahwisombe hwa Ngolobhe, ¹⁸ manya ogane wakwe, na genye gala gase gabhalilana nago, baada yala jiziwenendajizyo. ¹⁹ Eshi tiyanye aje olijivi wewe hu mwenee olilongozi wabhasebhalola apazelu hwabhala bhabahli hukisi, ²⁰ yasahihiswa alema, omwalimu wabhana nahuje oliyo huje edajizyo ezyemanyizu awe lyoli. ²¹ Awe basi, wuhugajila aweje, sahwimanyizya wewe? Wulombelela aje mugaje hwibhe awe sohwibha? ²² Awe oiga, muganjebhebhegu? Awe, wovitwa eshilolesyo eshi, ohwibha mwi

kanisa? ²³ Awe wohwisovya hu ndajizyo, eshi sokenyensyewa na Ngolobhe huje onagenye endajizyo? ²⁴ Hwa huje “itawa elya Ngolobhe likenyesewa hwa bhatu bhasebhaputa ashile hulimwe,” nashisesibwilwe. ²⁵ Awe atahilwe lyoli shinza nkoyogope edajizyo nantele nkašhile awe oligalugalu wedajizyo, atahilwe hwaho hubhaje sotahiliwe. ²⁶ Eshi, nkašhele, omtu yasagatahilwe ahwendelela akhate amazu age dajizyo, eshi asintetahiliwe kwakwe sehwaye jelwa huje atahiliwe? ²⁷ Wope yasatahiliwe hushikulilo sagadahulonje nkašhele abhatimizeye edajizyo? Ene hwa huje olinesimbo zyazisimbwilwe ne tohala huje osele ali galuhani hudajizyo! ²⁸ Nantele omwene saga Muyahudi yali huhali eya hwonze; hubhe hutahilwe sagahwahula wahuli hwahwonze wene hu humbele. ²⁹ Nantele omwene Muyahudi yalimhati, ne tohala eyaha muvoyo, hu fijili. Saga hunsimbo esombo ezya mtu owe sho sagafumila hwa bhatu gafuma hwa Ngolobhe.

Ulyango 3

¹ Huja faida wele yalinayo o Muyahudi? Nantele efaida gatalilwe yenuu? ² Shinza sana hwidala. Hwaga goti, Ayahudi bha hambilila okwi kule afume hwa Ngolobhe. ³ Eshi, ebhabhe wiele nkašhele bhamo bhamo sagabhali no winza huje asinte hweteshela hwabhene hubhalenganye owinza wa Ngolobhe aje mbibhi? ⁴ Ha aa. Nantele hwakwe, leshe Ongolobhe abhoneshe aje lyoli hatankashile kila

mtu ali ni lenga. Afume shayahali yasimb-wilwe, “Huja awezye abhoneshe aje omwene alinehaki hunongwa zyaho, aje owezye ashi dane potoha hulonzi.” ⁵ Nantele nkashile obhibhi wetu ulanga elyoli ya Ngolobhe, tiyanje yenu? Ongolobhe saga mwalangani pafumya ilyoyo lyakwe, huje ali esho? Eyanga alengane ne nongwa ezya bhantu. ⁶ Ha aa! Shabha wele Ongolobhe ailinga esi? ⁷ Nantele nkashile lyoli eya Ngolobhe ashilile hwile ga lyane efumya esombo zinyiji hwa mwene, yenu nkashele esele elongwa nashi yali nembibhi? ⁸ Yenu tisiyanje, aje bhatandile wena nashi abhaje bhabhabhoneha aje bhayanga, “Tibhombe ebibhi ili aminza genze”? Olonzi hubhene we lyoli. ⁹ Yenu eshii? Tilamba tibhene? Nemo kabisa. Hwa huje ate tayali tibhadiye Ayahudi na Yunani bhoti pamoja, aje bhali pasi ye mbibhi. ¹⁰ Eli nashi salisimbwilwe: “Nomo yali ne haki hata omo. ¹¹ Nomo omtu yali ahwelewa. Nomo omtu gahamwanza Ongolobhe. ¹² Bhoti bhagalushe. Bhene hwa bhoti bhali sebhane maana. Nomo yabhomba aminza, la, hata omo. ¹³ Amakhalo gabho nkonywayeli nyazi. Emele zyabho zikhopelwe. Esumu eyenzoha eli mmalomu gabho. ¹⁴ Amalomu gabho gamemile oyejelo no bhawe. ¹⁵ Amanama gabho gashebela ahwite edanda. ¹⁶ Onankanye na mayemba gahweli ashilile mwidala lyabho. ¹⁷ Abhatu ebha sagabhali menye idala ilinza. ¹⁸ Sagabhali nowaga wo Ngolobhe hwitagalila lye maso gawo.” ¹⁹ Eeshi limenyu huje hahonti edajizyo

naziyanga eyangana bhala bhabhali pasi penda-
jizyo. Eshi hubhe shila lilomu limimanywe, nan-
tele huje esi yoti eweze aajibishe hwa Ngolobhe.
²⁰ Eshi huje nagumo obele ngwa gwa bhaziwa
lyoli hu mbombo eye ndajizyo hwitangalila hu
maso gawe. Hwa huje ashele ne endajizyo
zihwenza enjele ezebibhi. ²¹ Huje eshi bila yen-
dajizyo, ehaki ya Ngolobhe emanyisho. Eyajilwe
hudajizyo ezyakuva, ²² eyo haki ya Ngolobhe,
ashele enyinja ezwa Yesu Kilisiti hwa bhala
bhoti bhabha humweteha. Mana nemo tofauti.
²³ Hwa huje bhoti mbile embibhi napongoshelwe
na tutumu wa Ngolobhe. ²⁴ Bhabhaziwe ehaki
eyewene huwene wakwe huje hwidala elye
fwozi wali ashilile Kilisiti oYesu. ²⁵ Huje nantele
Ongolobhe afumizye oKilisiti oYesu abhe patanyi
hwidala elinza ashele hu danda yakwe. Afu-
mizye oKilisiti abhe shahidi owe haki yakwe huje
azileshe owehaki yakwe huje azileshe embibhi
zyazishelile ²⁶ aje ajimbizye hwakwe. Ega
gonti gafumiye alolosye ehaki yakwe husiku
ezyeshi eli lyali aje bhahwibheshe pazelu yoyo
abhe haki, na lanje aje hubhazizye elyoli omtu
yayoti hu nyinza shelele oYesu. ²⁷ Huli hwi
ahwisavye? Hubagulwe humusingi gwalihuu?
Omusingi gwe mbombo? Adii, eshi omusingi
ogwe nyinza. ²⁸ Eshi timalezya aje omtu ab-
haziwa elyoli hu nyiza pase pali nembombo ezye
ndajizyo. ²⁹ Aje Ongolobhe huje Ngolobhe wa
Yahudi bhene? Eshi omwene saga Ngolobhe
woti bhase Bhaputa bhope? Ena, bhase bhaputa
bhope. ³⁰ Nkashile lyoli Ongolobhe ali omo,
aibha bhazizya elyoli bha bhali bhelohala eny-

inza, nabhasebhatahilwe hwidala elye nyinza.
³¹ Aje ate uyu galulenye edajizyo hunyinza ndali
 eshingu eshego ate tizibheshele pazelu enda-
 jizyo.

Ulyango 4

¹ Taiganga hwele nantele huje o Ibulahimu,
 yise wetu hwidala elye bele, apatihene?
² Nantele nkashele u Ibulahimu abhaziwa elyoli
 hu mbombo, hangali nenangwa ezyahwisovye,
 nantele saga hwitagalila Iya Ngolobhe. ³ Eshi
 ensimbo zigawele? “Abulahamu amwetesheye
 Ongolobhe, na bhaziwe hwakwe huje alinelyoli.”
⁴ Eshi hwa mtu yawombe embombo eposhenzi
 zyakwe sezibhaziwa huje hee wenee, hwa huje
 eshi lideni. ⁵ Nantele hwa mtu yasaga abhomba
 embombo nkashele ahumweteha omwene
 yali ahubhazizya elyoli yasagali bhatamu,
 enyinza zyakwe umtu oyo zibhaziwe huje
 lyoli. ⁶ O Daudi wope ayanga esalifyo hwa
 mtu yali Ongolobhe abhazizizye elyoli pasepali
 nembombo. ⁷ Ayajile, “Bhasalifiwe bhala
 bhabhali embibhi zyabho zisajilwe nabhala
 abhezambe zyabho zyazikwishilwe. ⁸ Asalifiwe
 omtu ola nkashele Ogesi sabhazizizye ezambe.”
⁹ Eshi huje ensalifyo zyabhala bhabhatahiliwe
 bhene, huje nabha sebhatahiliwe? Eshi tiyanga,
 “huje o Ibulahimu enyinza zyakwe zyabhaziwe
 huje lyoli.” ¹⁰ Huje yabhaweweleshi? Shila
 o Ibulahimu ali hu tohala, nantele sasele
 atahilwe? Sagayali hu tahilwe, eshi ashele
 tahilwe. ¹¹ O Ibulahimu ahambilile ehalama
 yatahilwe. Ogu gwali muhuli gwela ehaki

enyinza yalinayo hani sasele atahilwe. Efumizyo ezyandolesyo ene huja abhombeshe abhe baba wa bhoti bhabhahweteha. Atankashile bhahweli bhabhali atahilwe. Eshi hwahuje ehaki yaibhaziwa hwabhene. ¹² Ene yope yamisizye aje o Ibulahimu abhombeshe baba we tohala saga hwabhala bhabhafumila mutohala aje nabhala bhabhazilondola enyayo zya baba wetu o Ibulahimu. Huje ene nyinza yalinayo hwabhatahilwe. ¹³ Hwa huje sanayahali hudajizyo aje eahadi ehafumiziwe hwa Ibulahimu ne papo yakwe, eahadi ene eyaje bhaibhabhagali bhesi huje ehaliashelenle ehaki eyenyinza. ¹⁴ Huje eshi nashi bhala bhe ndajizyo huje bhagali, enyinzizili nahamo, ne ahadi egalu zenywe. ¹⁵ Huje eshi edajizyo zileta ilyoyo, huje pala pasepali nedajizyo, nahumo huje huli eshishi. ¹⁶ Hwa huje eli sagalyafumie hunyinza, aje ebheye wene. Amafumilo gakwe, eahadi elipazelu hu mpapo yoti. Na zawa ebha sagaje bhala bhabhamenye edajizyo, huje bhala bhali nenza ezya Ibulahimu. Huje omwene isewetu ate tenti, ¹⁷ nashi sesibwilweli, “Ebheshele awe abhe baba wensi enyiji.” O Ibulahimu ali hweli hwola ya menye yaani Ongolobhe yasaga abhapiye abhafwe owomi na kwizye enongwa zyanazimo ajezibhe. ¹⁸ Hata zibhe zyoti zya hwoze, Abulahamu abhejivi amawaminiye Ongolobhe hu siku zyazihwenza. Eshi abha baba wesi enyinji alengane nahala hahagajilwe,”... Esho shayaibha empapo yaho.” ¹⁹ Omwene sagali bhinu hunyinza. Abulahamu aheteshe aje obele gwakwe yoyoo gumalishe

afwe - ali no umuli wesiku amaha emia emo. Nantele ahetehe ne hali eyafwe eyevyanda uya Sala. ²⁰ Eshi alengane ne ahadi eya Ngolobhe, o Ibulahimu sagasitile ahumweteshe. Nantele, apewilwe eguvu hunyinza nantele asombe Ongolobhe. ²¹ Ali amenye loli aje hala hahali Ongolobhe haaidiye ali nouwezo owa hakamilisye. ²² Hweli lyope lyabhaziwe humwene abha haki. ²³ Eshi sagayasimbwilwe wene hufaida yakwe, aje yabhaziwe hwa mwene. ²⁴ Yasimbwilwe huliti nantele, hwa bhabhishewe abhaziwe atatili tihwetehe aje omwene azyozyeze Ogosi wetu oYesu afume hwa bhafwe. ²⁵ Ono yayola yalifumiziwe hu mbibhi zetu nazyosewe aje tipate abhaziwe ehaki.

Ulyango 5

¹ Hwa hubhe tibhaziwe ehaki hwidala eleyem-inza, tili nitumaini no Ngolobhe hwidala lya Gosi wetu oYesu Kilisiti. ² Ashelile omwene nate eshitili nefulusa hwidala wauli muhati mwa mwene tihwemelela. Tishima hujivi watipela Ongolobhe hwaajili yapamade, ojivi owo taishiliki huu tatumusi wa Ngolobhe. ³ Saga eli tu, huje eshi tishima humayemba getu. Timenye huje amayemba gapapa ovumilizu. ⁴ Ovumilizu papa ahwetehe, na ahwetehe papa ojivi hujili yapamande. ⁵ Ojivi sagauli nenvubhi, huje ogano olwa Ngolobhe lwitilwe hu moyo getu ashelile Ofijili Omwinza, yali afumiziwe huliti. ⁶ Hwatali tilibhabhinu, husiku zila oKilisiti afwiye hwajili yabhibhi. ⁷ Hwa huje pakhome omo afwe hwajili ya mtu yali nehaki eshi huje. Pamo omtu

alenje afwe hwajili ya mtu omwinza. ⁸ Nantele Ongolobhe ahakikisizye olugano lwakwe yuyo huliti, huje lala patali tili nezambe, oKilisiti afwiye hwaajili yetu. ⁹ Eshi zaidi yagoti, eshi hwahubhe tibhaziwe ehaki hu danda yakwe, tibhafwolwe hweyo afume hwi lyoyo lyo Ngolobhe. ¹⁰ Hwa huje, lula patali tizile netapanyiziwe no Ngolobhe hwidala elyafwe omwana wakwe tee nantele palitiliti malishe apatanisiwe, taifiolwa hunsiki zyakwe. ¹¹ Saga esho tu, nantele limo ga hwa Ngolobhe ashilile Ogosi oYesu Kilisiti, ashilile omwene aje eshi tambiliye akondanyo ogu. ¹² Eshi basi, nkashile ashilile hwa mtu omo embibhi zyahenzele hwidala eli efwa ehenzele hwidala elye mbibhi. Nantele afwa hwanyampa na hwatu woti, huje bhoti bhabhombile embibhi. ¹³ Hwa hubhe huje edajizyo, embibhi zyali msi, eshi embibhi sagazibhaziwa nkashele nemo edajizyo. ¹⁴ Hata eshi, afwa hwatabhalile afume Ahadamu no Musa, hata hwabhala bhasebhabhombile mbibhi nashi asitebhe neshishi hwa Hadamu, yalishilolesyo esha mwene yahenzaga. ¹⁵ Nantele hata eshi, opezi owewe ne sagaje hutule nkashele atule limo bhiji bhabhafwiye nantele sana owene owa Ngolobhe pezi owene hwantu omo, oYesu Kilisiti, ezidile ahwanjelele hwa bhiji. ¹⁶ Hwa hubhe opezi sagaguli nashi efumilo ezio la yali abhombile embibhi. Hwa huje hudwemo humo olonzi owilyoyo wahenzele hutuli yalile omtu omo. Nantele hudwemo humo eshipawa eshewene shashifuma aje obhaziwe ehaki yahenzele pamaade ye makosa aminji. ¹⁷ Hwa huje, nkashele ikosa elya

omo, afwe hwatabhalile ashelele hwomo, nantele hani bhala bhabahi yambilila owenee owiji neshipawa eshelyoli bhaitabhala ashilile akhale hwa omo, oYesu Kilisiti. ¹⁸ Eshi basi, nkashe shilila etulo ezaomo wetu bhoti bhahenzele hulonzi huje ashilile huntulo emo hwu henzele abhanziwe elyoli eyesiku ezabhantu bhoti. ¹⁹ Hwa hubhe aje shilile asinte abhe neshishi hwa mtu omo bhinji bhabhombilwe aje bhali nembibhi, eshi ashilile hushishi eya omo bhinji bhaibhombwa aje bhali nelyoli. ²⁰ Nantele edajizyo zyahijiye pamo ajeikosa liwezye ahwenele. Nantele palapapali embibhi yazidile abhenyiji, ewenee yahonjeleya tee. ²¹ Ene yafumiye huje, eshi nashi embibhi sazyatabhalile hufwa, shashesho hata owene uwezi atabhale shilile hulyoli hwajili yadele esikunesiku shilile oYesu Kilisiti Ogosi wetu.

Ulyango 6

¹ Tyanje yenu eshi? Lendelele humbibhi huje owene wanjelele? ² Haa. Ata tatifwiye humbibhi tibhawezye ntele adele hwenyo? ³ Huje semumenye aje bhala bhabhahojile hwa Kilisiti bhahojile hufwa yakwe? ⁴ Taliti syelelwe tetinomwene ashilile owoziwa hufwa. Eli lyabhombwilwe aje eshi huje shila oKilisiti shabhosewe afume hufwa ashilile otutumusu owa Baba, aje eshi natetiwezye ajende huu pya owa dele. ⁵ Eshi nkashile tikhomenywe peka nawo hushifwani eshefwa yakwa, nantele taikhomanyiziwa hufwa yakwe. ⁶ Ate

timenyu eshi, outu wetu owehale wakhobhehenywe pamo nawo, aje eshi obele ogwe mbibhi gunankanye. Eli lyafumile aje neshi tisihwendelele bhatumwa bhe mbibhi. ⁷ Omwene yali afwiye abhombwilwe wehaki alengane nezambe. ⁸ Eshi nkashele tifwiye pamo no Kilisiti, tihwamini aje tidela pamo nomwene nantele. ⁹ Timenye aje oKilisiti azyozyelwe afume hwabha fwe saga fwe nantele efwa saga ehutabhala nantele. ¹⁰ Hwa huje eshi ejango eyafwe shafwiye humbibhi, afwiye limo hwajili ya bhoti hata eshi edelo zyadela adela hwajili ya Ngolobhe. ¹¹ Hwi dala lyelyo, namwe huje muhwanziwa ahwibhazye aje bhafwe hu mbibhi, aje bhomi hwa Ngolobhe hwa Kilisiti oYesu. ¹² Hwa huje esho esiluhusu ezambe etabhale ombele gwaho aje obhene shishi hu nyonyo zyakwe. ¹³ Osihwefwe eshemu ezyembele gwaho humbibhi nashi evyombo vyasaga viline haki. Eshi hwifumi mwemwe hwa Ngolobhe. Nashi bhali bhomi afume hufwe eshi zifumi eshemu ezye mabele genyu abhe vyombo vye-haki hwa Ngolobhe. ¹⁴ Mganje aileshe zambe ebha tabhale hwa huje sagamli pasi yendajizyo, huje pasi wene. ¹⁵ Yenu eshi tibhombe embibhi hwa huje sutihweli pansu ye ndajizyo, huje pasi ayewene? Ha aa. ¹⁶ Semmenye aje hwamwene yuoyo yali muhwifumya mwemwe nashi atumwi mwamuli mwemwe mubhabhe bhatumi bhakwe omwene, yahwanziwa humwogope? Eshi lyoli hata nkashile amwemuli bhatumwa bhezambe eyo yebha twalila hufwa naje bhatumwa mwa bheshishi wauwatwalila

huhaki. ¹⁷ Hwa huje asalifiwe Ongolobhe! Huje mwali bhatumwa bhe mbibhi, eshi mwa-hogope afume humwoyo ela yeli yefudizyo zyamwapewilwe. ¹⁸ Mbhombwilwe wene afume mbibhi na mbhombwilwe ubhe bhatumwa bhi haki. ¹⁹ Eyanga nashi je mtu owe sababu ye mab-hine age mabele getu huje nashi shila shamwa-hefwizye eviungo evyambelegwenyu abhe bha-tumwa bhe chafu ne mbibhi zya zili nashi ezyo, eshifumi eviungo evye mabelegenyu aje mulibhatumwa bhe haki hu wozwo. ²⁰ Hwa hubhe pamwali bhatumwa bhembibhi mwali wene huje nelyoli. ²¹ Hu siku ezyo, mwali nidodolo lyali hu hunongwa gali geshi mulola esoni hwego? Hwa huje efumilo yenongwa eyo hufwe. ²² Hwa hubhe eshi mubhombwilwe wene shibhala ne mbibhi na mubhombeshe abhe bhatumwa bha Ngolobhe, mli nidodola huajili yewozye. Afume huwoni owewila. ²³ Hwa huje emposhezi ye mbibhi hufwe eshiopezi owu wene wilawila owa Ngolobhe huje womi owe wilawila hwa Kilisiti oYesu Ogosi wetu.

Ulyango 7

¹ Aje semmenye, mwaholo bhane (hwa habhe eyanga na bhatu bhabhaimenye edajizyo), aje edajizyo ehatabhala omtu pali mwomi? ² Hwa huje oshe yayegwilwe afungwilwe nedajizyo hwola olume wakwe pali mwomi nantele huje olume nkawafwa abhabhe abhehwilwe wene afume hundajizyo eye ndowa. ³ Eshi basi, husiku olumu wakwe nkali sadela, huje adela no lume owenje tiigahuni nkashe. Je olume

wakwe afwiye aliwene hundajizyo, esho sagabhabhe huni nkashele adela nalume owenje. ⁴ Hwelyo, mwaholo bhane, amwe eshi mwabhombwilwe bhafwe bhe ndajizyo hwidala elye mbele gwa Kilisiti. Eli eshi aje tiuganisiwe noweje hwamwene yuoyu yali azyosyelwe afume hwabhafwe aje tiwezye hupapile Ongolobhe amadodolo. ⁵ Huje patali tili shi bele, enyonyo ezye mbibhi zya damuziwe hu viungo vyetu hwidala elyedajizyo naipapile efwa amadondolo. ⁶ Nantele ehi tipinyilwe afume hudajizyo. Tiifweleye ela yayli etikhomile. Aje ate tipate atumishe hu hali empya ye Fijili, nate huhaliye made ye nsimbo. ⁷ Tiyajewe eshi? Endajizyo aje mbibhi? Haa. Hata eshi, senezagai manye embibhi, hangasaya hali hwidala lye ndajizyo. Aje saganatheza gama asangwe aje ndajizyo hangasaga eyanjile, "Osinyonye." ⁸ Huje embibhi yapate nafwasi hwela eemuli nalete muhati mulini shila aina eyensongwo. Huje embibhi pasagapali endajizyo efwiye. ⁹ Nane ehali mwomi epo olwahwande bila ndajizyo, eshi pehenza ela eamuli embibhi yapete owomi, nane nafwa. ¹⁰ Ela eamuli yayali elete owomi yagalushe abhe fwa hulini. ¹¹ Hwa huje embibhi yapete enufwa si hwela eamuli nantele yahop-eye. Ashilile hwela eamuli, yangojile. ¹² Eshi edajizyo ntufye, yope ela eamuli ntufye, yelyoli na nyinza. ¹³ Eshi basi elayeli nyinza yalifwa hulini ane. Eganjebhe sho kabisa huje embibhi yaloleshe abhe mbibhi hani ajedele hwela eny-inza ehaletile efwa muhati mlini. Eneyali aje

huje ajendele hwela eamuli embibhi zyonje lele abhe mbibhi tee. ¹⁴ Hwa huje timenye yahuje endejizyo shikulilo shakwe shahumwoyo eshi-ane endimtu webele. Enkaziwe pasi patumwe owembibhi. ¹⁵ Aje lye bhomba saga, edimanya shinza. Aje lila lyedigene abhombe saga edibhomba nalila lyendivitwa lyebhomba. ¹⁶ Aje shi nkembalibhombe lila lyasaga endigene ehwetehana nedajizyo eya je edajizyo nyinza. ¹⁷ Huje eshi saga nene humwoyo gwane nebhomba elyo, huje yoyela embibhi yekhala muhati mlini. ¹⁸ Hwa huje emenye aje muhati mlini aje muhati mbele, gwana sezikhala enongwa. Enyenza hwa hubhe enyonyo eyeliza eli muhati mulini, aje sebhomba. ¹⁹ Hwa huje lila elinza lyedigene saga edibhamba huje lila ibhibhi lyasaga edigene lyebhomba. ²⁰ Eshi khashele ebhomba lila lyasaga edigene saga nene binafusi nebhomba huje yayela embibhi yeli muhati mulini. ²¹ Emenye, nantele ehveli ekanu ni muhati mulini ya hwanze abhombe lyalili linza eshi embibhi lyoli zihweli muhati mulini. ²² Hwa huje ejisongwelwe edajizyo yo Ngolobhe hu utu owa muhati. ²³ Eshi ejilola ekanuni yeli payo huviungo vyavili mble gwane. Ekho mana ibho huzidi ya kanuni empya hujele zyane. Embomba ane abhekhatwe hukanuniye mbibhi mbibhi yeli huviungo vyavili mubele. ²⁴ Ane edi mtu we sago wenu gadafyole no mbele oguugwe fwe? ²⁵ Eshi salifi hwa Ngolobhe owa Yesu Kilisiti Ogosi wetu! Aje eshi ane nene hunjele zyune enjitemishila endajizyo ya Ngolobhe. Aje hubele ejitemishila

kanuni yenzambe.

Ulyango 8

¹ Eshi hwe lyo basi na umo olozi owi lyoyo hwabhene bhabhali bha Kilisiti Yesu. ² Hwa huje ekanuni eya Finjili owe womi ula wauli hwa Yesu Kilisti embobile ane abhe mwaule hutali ne kanuni ye mbibhi nefwa. ³ Hwa huje hala hahali edajizyo ya menilwe abhombwe huje yali nzaifu humbele, Ongolobhe abhombwe. Atumile Omwana wa kwa owalimwene kushifwani webele we mbibhi abhe sadaka ya mbibhi, na iilonga embibhi humbele. ⁴ Abhombwe eshi aje amalajizyo age ndajizyo gatimilishe muhati yetu, ate tasagabhala alondole enongwa ye bele, eshi bhala bhabhalo ndola Ofijili enongwa ya Fijili. ⁵ Bhala bhabhalondola ombwe bhasebha enongwa ezyembe, eshi bhala bhabhalondola Ofijile bhasebha enongwa eya Fijile. ⁶ Hwa huje enia ye mbele hujefwa, aje enia eyefijile womi no winza. ⁷ Ene hujeela enia ye bele eli evisene no Ngolobhe, huje sagaeli neshishi hudajizyo ya Ngolobhe, nantele saga ewezya ayogope. ⁸ Bhala bhagulondola obele sagabhawenzya ahugana Ongolobhe. ⁹ Hata eshi, saga mlinu bele mli hwa Fijile, nkašhile lyoli huje Ofinjile wa Ngolobhe ukhala muhati mulimwe. Nantele nkašhele mtu sagali no Finjile owa Kilisiti, omwene sagawakwe. ¹⁰ Nkašhe Kilisiti ali muhati yenyu obele yufwiye hunongwa eye mbibhi, aje finjila ali mwami hunongwa eye lyoli. ¹¹ Nkašhele Ofinjile wa ola yazwosyenzye oYesu afume hwabhafwe akhala muhati mulimwe, omwene ola

yazwozyezye Kilisiti afume hubhafwe aigapela amabele genyu agafwe owomi hwidala elye Finjili wakwe, yadela muhati mulimwe. ¹² Eshi huje, mwaholo bhane, ate tilini deni, lakini saga hubele huje tikhale hu jisi yebele. ¹³ Aje nkashele mudela hujisi ye mbele mlipepe afwe, nkashe hwa Finjile mugoga embombo ezyebele namwe mubhakhale. ¹⁴ Eshi hwa huje nashi abhinji bhabhalongozewa no Finjile owa Ngolobhe, ebha bhana bha Ngolobhe. ¹⁵ Hwa hubhe sagamwahambilile Ofinjile owetumwa nantele hata mwogope. Badala yakwe, mwahambilile ofinjile eya bhombwe aje bhana bhabhali hwelyo tilila, "Abba, Baba!" ¹⁶ Ofinjile yuywo ayanjile pamo nefinjile zyetu aje tili bhana bha Ngolobhe. ¹⁷ Nkashele tili bhana, huje tili bhagalinaje bhagali bha Ngolobhe. Nate tili bhagali pamo no Kilisiti, nashele hu lyolli tiyemba no mwene aje tipate otutumusi pamo nomwene. ¹⁸ Hwa huji ghabazya amayemba age siku ezi abhe saga hatu nkeleganisya notutumu wawaikwi nkwinkulwu huliti. ¹⁹ Hwa huje evibhombe vyoti eshi vihwenyeze hu shahuku enyinji akwinkuliwe hwa bhana bha Ngolobhe. ²⁰ Hwa huje obhombaji wope wa hogofyewe pasi yeshishi sagahwi gane lyakwe, ila husabu yakwe omwene yuoyo yahogofye. Zye hwitumaini ²¹ huje obhombi wene wope wa ibhehwa wene nafumiziwe hutumwa owenankanye, na hwijizye huwene we tuntumu wa bhana bha Ngolobhe. ²² Hwa huje timenye eyaje obhombi obho wope ubhina nayembe hu chungu pamo hata eshi. ²³ Saga eshotu, nate tete

tatiliu na malibuko age Finjile - tete nate tibhina hunafusi zyetu, tigolela abhombwe bhana yaani ofyozi owe mabele getu. ²⁴ Hwa huje hwi talaja eli tatifyolelwe. Eshi hatu hahaihwenza nkahabhoneha nahumo asobhele nantele, hwa huje wenu yasobhela hala hahalola? ²⁵ Aje nkatisobhela ahatu hasaga tihalola, tihagolela husabuli. ²⁶ Hu jisi yeyela, Ofinjile wope ata vwa hubhine wetu. Hwa huje sagatimenye alabhe she hwanziwa, eshi Ofinjile yuoyo atilabhila hubhine hwasaga hwawezye atambulwe. ²⁷ No mwene ya hwenya moyo aimanya enjele eya Finjile, huje alabha huniaba yabho bhabheteshe alengane nogane wa Ngolobhe. ²⁸ Ate timenye ya huje hwa bhonti bhabha genwe na Ngolobhe, omwene abhomba enongwa zyonti pamo hu winza, wa bhala bhonti bhabhakwizilwe husini yakwe. ²⁹ Hwa huje eshi bhala bhonti bhabha bhamenye ahwande huhale, eshi abhasalunye awande huhale, bhalenganyiziwa neshifwani sha Mwana wakwe, aje omwene abhe papwa wa hwande pandwemo naholo abhinji. ³⁰ Na bhala bhabha salunye afume ehale ebho abhakwizizye nantele. Na bhala bhabhakwizizye ebho abha bhazizye ehaki. Na bhala bhabha bhazizye ehaki ebho nantele abhatutumusizye. ³¹ Tiyanje yenu eshi pamwanya yenongwa ezi? Ongolobhe nkali oupande wetu, wenu yalipamwanya paliti? ³² Omwene yasaga husebhanya omwana wakwe yuoyo aje afumizye hwa jili yetu atententi abhakosa wela ati kulimi nenongwa zyonti pamo nawo? ³³ Wenu yandabhatake ateule bha Ngolobhe? Ongolobhe yuoyo omwene yandab-

hazizye ehaki. ³⁴ Wenu yaibhalonjela ilyoyo? O Kilisiti oYesu yuoyo afweye hwajili yetu, nantele wega omwene wope azyosyewe. Wope atabhala pamo no Ngolobhe pala pali neshishi nantele yayo yoo yatilabhila ate. ³⁵ Yu nanu yabhatibagule nogane wa Kilisiti? Amalabha, aje, eshida, aje amayemba, aje enzala, aje oteowalele, aje ehatali, aje ipanga? ³⁶ Nashi isesimbwilwe, “Hu faida yaho tigogwa osagawo. Ntitibhaziwe nashi ngolo ezya sinzye.” ³⁷ Nashi enongwa ezi zyonti ate tili sana ya bhashila hwa mwene yatigene. ³⁸ Hwa huje emalisha asohwe aje huje, ofwe, owomi, huje ahala ozelu, huje amamulaka, huje evitu vya vihweli, huje evitu vyavihwenza, huje eguvu, ³⁹ huje galipamwanya huje vyavilipansi huje, eshibhombwa shashonti shila, seshibha wezye atibagule nogana wa Ngolobhe yali yo Kilisiti oYesu Ogosi wetu.

Ulyango 9

¹ Eyanga elyoli hwa Kilisiti. Seyangailenga, humwoyo gwene eshudila pandwemo nane hwidala Opepo Ofinjile, ² huje huli azugumile ohogosi abhawe hwa saga humaliha muhati yemwoyo gwane. ³ Nezagazilisha ane nemwene alogwe abhehwe hutali nu Kilisiti huje aholo bhane, bhala abheshikholo shane ashilile obele. ⁴ Abhene bha Israeli. Bhabhehwelwe huje bhana, abhe tufiwe ayangane, ezawadi eya logwe, hupute Ongolobhe, na malagano. ⁵ Ebhene bhabhatagalizizye ohwo Kilisiti ahenzele enshinshi akwate obele oguu - huje oyo uo

Ngolobhe wa bhoti. Wope ayeme hwaje wilawila. Amina. ⁶ Sehuje amalagano ga Ngolobhe hujezikunilwe afishe. Sehuje kila mutu wali Israeli nasebha Israeli bhebho. ⁷ Sehuje bhoti bhali bhana bha Abulahamu huje bhali bhana bhakwe bhebho. Lakini, “naashilile u Isaka abhana bhaho waikwiziwa.” ⁸ Hweli hwahuje, abhana abha mbele sagabhana bha Ngolobhe. Lakini abhana abhe ahadi bhahwenyezewa huje ebha ndabhana. ⁹ Elilizuu elyahadi: “Nane majira ego naye hweza, nu Sala aipata omwana.” ¹⁰ Sagalyalyeli tu, lakini pamaade u Lebeke abhapate evyanda hwa mtu omo, o Isaka udaada wetu- ¹¹ hwahuje abhana bhali nsele apapwe na alibado abhombe ijambo lyolyonti elinza au ibhibhi, huje ikusudi elya Ngolobhe alengane nachagule lyemelele, wala sehuje humiza, lakini sehwhahuje yola wahukwizya. ¹² Lyayagwilwe huje, “Ogosi abhahutumishile ododo.” ¹³ Nashi sashili huje lyahandihwe: “U Yakobo nagene, lakini u Esau navitilwe.” ¹⁴ Hwa huje tiyanje yenu? Huje lihweli ilenga hwa Ngolobhe? Huje dadi ¹⁵ Hwa huje eyaanga ahusu oMusa, “embabhe neisajilo hula wembahusajile, na ebhabhe ne sajilo hwola wembahusajile.” ¹⁶ Hwa huje bhasi, saga yuyo oyo wabhahwanze, wala sagayuyo oyo wanyila, lakini hwa huje yu Ngolobhe, hwa huje abhonesha asajile. ¹⁷ Hwa huje aamazu gayanga hwa Falao, “Hwa huje ega goti galinsini ambuinule, huje ebhoneshe aguvu zyane ashilile wewe, nahuje iitawa lyane lirumbelelwe ensi yoti.” ¹⁸ Huje bhasi, Ongolobhe abhane sajilo-

hwa wowoti wagene, nahwola wahugana, ahubheha abhe hali. ¹⁹ Nantele ubhayanje hwalini, “Yenu alola ikosa? Yo lihu wagamalile agajimbile amambo gakwe?” ²⁰ Ahosi yakwe, omwanadamu, aweve nanu woyanga kinyume nu Ngolobhe? Huhweli aweze hane lyolyoti lya hahabhombelwe hayanga hwula wabhombele, “Huje yenu wambombele eshi ane?” ²¹ Je wabhomba sagali nehaki hwi-longo elyaleganyizye evyombo humatumizi gega hweli afumilane nuvilima ulaula, ne shombo esha mwabho shibha na matumizi kila siku? ²² Wole nashi Ongolobhe, umwene alitayali wabhonesye enkuni yakwe naabhombe amaha gakwe amanyishe, ajimbile navumilile huiye evyombo evya enkumi vyevibhehwelwe kwajili ya goje? ²³ Woole nkashile abhombile enga abhonesye ohwinji we utukufu wakwe hu vyombo evya rehema, avibeshele tayali kwajili yeutukufu? ²⁴ Wole kashile abhombile eli, je hulitu, hwa huje nate alitwizizye sagahuje afume Wayahudi, nantele afume nahwa bhantu bha Mataifa? ²⁵ Nashi sayanga mwa Osey: “Embahakwizye abhantu bhane bhabhali saga bhantu bhane, nuula wagene natele nuula wasaga agenwe. ²⁶ Na abhabhe huje pala palyayagwilwe hwa bhene, 'amwesagamlibhantu bhane,' pala bhezekwiziwe 'abhana bha Ngolobhe wali mwomi.’” ²⁷ O Isaya alila ashilile nebha Israeli, “Huje abhazye abhana bha Israeli engelinashi usanga gwa mbahali, ebabhe nashi bhebbhasageye bhazabhe nashi bhabhahwokolewe. ²⁸ Hwa huje Ogosi abhahweje izuu lyakwe hwumwanya

na pansi, sasele nahwa utimilifu. ²⁹ Nashi oIsaya sayanjile ehale, “Nashi Ogosi owemanjeshi sagatilesheye akhosi ouzao kwaajili yaliti, angatili nashi e Sodoma, nangatibhombilwe nashi e Gomora. ³⁰ Tibhayanje genu lelo? huje abhantu abhe Mataifa huje bhahali sagabhahwanza elyoli bhapente elyoli, elyoli huimani. ³¹ Lakini abha Israeli, bhahazile ikalata elyelyoli, sagayiifishie. ³² Yenu yalyesho? Hwa huje sagabhaiyazile huimani, bali huu matendo. Wabomele pamwanya yiwee na bhabomelee, ³³ nashi seyagwilwe enyenye, endigonizye iee elya abomelee, hu Sayuni nahuje owakose. Omwene wahu-poshela hwelii sagabhakenyese.

Ulyango 10

¹ Mwaholo, esebho ezya mwoyo gwane napu tehwane hwa Ngolobhe nihwajili yabhene, ne hwaajili yahwocoshe hwabho. ² Hwa huje embashuhudila huje bhahwituma hwaajili ya Ngolobhe, lakini sehuje njelezyabho. ³ Hwa huje sebhaimenye elyoli ya Ngolobhe, nabhahwanza azije elyoli yabho bhebho. Saga bhahwisyaga hulyoli ya Ngolobhe. ⁴ Hwa huje iKilisiti yuyo watimizye isheliya eyelyoli huje omtu wahu-poshela. ⁵ Hwa huje uMusa ahwandiha ahusu elyoli eyo ehwenza ashilile ne eshelia: “Umutu wabhomba elyoli mshelia abhakhale hwa lyoli ene.” ⁶ Lakini elyoli yetumilana nashilile olweteho luyanga eshii, “Ogajeyanje humwoyo gwaho, 'Yonanu wabhahhale humwanya?'(Ohu hulete uKilisiti pansi). ⁷ Na ogajeyaje, 'Yonanu

abhahwishe mwilende?” (Ane, huleta uKilisiti humwanya afume hwabhafwe). ⁸ Lakini liyanga yenu? “Izu lipapepe nawe, afume mwilomu lyaho na afume humwoyo gwaho.” Elyo lizu elya luseshelo, elyo lya tiliyanga. ⁹ Hwa huje kashile hwilomu lyaho ohweteha oYesu huje Ugosi, na huposhele humwoyo gwaho huje Ongolobhe afyosezye afume hwa abhafye, ubhahwokoshe. ¹⁰ Hwa huje humwoyo omuntu ahmweteha napate elyoli, nahwilomu ahweteha napate opute. ¹¹ Hwa huje izu liyanga, “Kila wahuposhela saga abhakenyesewe.” ¹² hwa huje naumo olengano nu Yahudi nu Muyunani. Hwa huje Ugosi yoyola Ugosi wa bhoti naweshoma hwa bhoti bhabha hukwizya. ¹³ Hwa huje kila walikwizya itawa elya o Ugosi abhahokoshe. ¹⁴ Hwa huje bhole uwezizye hukwizye ola wasaga mwamweteshe? Bhagakhozya bhole ilibhawezye huposhele nashi oyo sagabhamwoyezye? Na bhezehozye hwoole pasipo uwalumbelele? ¹⁵ Bhezewezye bhole alumbelele, akashile sebhatumwilwe? - Nashi sagasimbilwe hwa huje owinza wemagaga gabhala bhabhatangazya enogwa enyinda izye mambo aminza!” ¹⁶ Lakini bhoti sagabhatejelezezye amazu. Huje oIsaya ayanga, “Ogosi, yunanu wahovezye otumwa wetu?” ¹⁷ Huje ulweteho luhweza afumilane natejezye na hwovezye hwizu elya Kilisiti. ¹⁸ Lakini eyanga, “Huje sagabhahovezye?” nalyoli kabisa. “Amazu gabho gamalisha afume hwoze nahunsi yoti, nenogwa zyahho zibhalile paka humwisho gwe dunia.” ¹⁹ Ashile

goti, Eyanga, “Huje Abhaisraeli sagabhamenye?” Kwanza uMusa ayanga, “Embabhadizye embabheshele uwivu hwa bhantu bhasaga bhe taifa. Hwidala elitaifa lyasaga lyahwelewe, embabhachochele paka mvitwe.”²⁰ Nu Isaya anilyomi sana naayanga, “Natangene navala bhasaga bhanazile. Nabhoneshe mhwavala hwa sagabhananzaga.”²¹ Lakini hwa Bhaisraeli bhayanga, “Ensiku zwoti nagolosezye amakhono gane hwa bhasagabhahwiyisizye nahwa bhantu aakhomee.”

Ulyango 11

¹ Huje eyanga, huje, Ongolobhe abhaxhanine abhantu bhakwe? Hata hashe. Hwa huje nane ne Mwiisraeli, wa mshikolo sha Abulahamu, hwi kabela lya Benyamini.² Ongolobhe zagabhakhene abhantu bhakwe abhamanye afume huwandilo. Je sagamenye izuu liyanga yenu ahusu o Eliya, jinsi sabholele Ongolobhe humwanya ye Israeli?³ “Ogosi, bhabhagojile ankoha bhaho, bhope bhabomoye pashiputo paho. Nene nimwene esagalye, bhope bhahwaza owomi wane.”⁴ Lakini ijibu elya Ngolobhe liyanga yenu huliwe? “Embeshele kwaajili yalini abhantu elfu saba ebho sagabhayikhomela amafu gamo Baali.”⁵ Hata eshi, wakati ou esalezi bhahweli bhabhasagaliye ashilile ouchaguzi wiwenee.⁶ Lakini kashile huweene, sehuje hwu matendo. Kashile weene sagaibhabhe nantele weene. Yeni bhasi?⁷ Ahantu ambaho Eisraeli yaliewhaza, sagahajile, huje bhabha chaguliwe bhahajile,

nabhamwabho bhabhehwele bhamwamu.
⁸ Nashi sagasimbilwe: “Ongolobhe abhapie opepo ogwasajilwe, amaso huje bhasilole, na makutu huje bhasiyovwe, epaka sanyono eeshii.”
⁹ Wope o Daudi ayanga, “Leha emeza zyangho nazibhe nyavu, tengo sehemu yaabomelee nalipizye eshisasi hwa bhene bhebho.”
¹⁰ Leha amaso gabho gabhehwe akisi huje bhagajelole. Ubhaundamishe amasana gabhowila.”
¹¹ Basi eyanga, “Huje bhabomelee hata bhagwile egajebhe?” Esho na mwaha. Badala yakwe, amenwe hwabho, olokole ufishe hwa Mataifa, ili bhebho bhene bhabhe nu wivu.
¹² Nkashile amenwe hwabho hutabhale evya paulimwengu, nakashile hasalayabho atabhale wa mataifa, nazibhabhe zilenga enyinji akamilishe hwabho?
¹³ Na esalezi eyanga namwe mubhantu bhe Mataifa. Hwa huje enditumwa wa bhantu abhe Mataifa aganje, ehwivunira huduma yane.
¹⁴ Labda engabhabhehe owivu gwambele pandwemo nanene. Nkanga tigabhokola bhabha hweli bhamo.
¹⁵ Maana huje akhanile hwabho bhapatene ne dunia, aposhelelwe hwabho haibhawole ila uwomi afume hwaabhafwe?
¹⁶ Nkashire amadondo agapawandilo akiba, shesho sashihweli hwibhomba elye ouzu. Nkashile amazi gope akiba, esamba zyope shesho.
¹⁷ Lakini nkashile zihweli esamba zyazidumulwe, nashi wewe, isamba lya mwipoli elya mzeituni, watotilwe pandwemo nabho, na nkashile wali pandwemo nabjo namumazi age otabhalo hwa mzeituni,
¹⁸ oganje

hwintutumule amwanya yemasamba. Lakini nkashile uhwintutumula, nasaga wewe ohwavya mumazi, bali amazi gahumwavya awe. ¹⁹ Basi ubhayanje, “Amasamba gadumulwe huje epate atotwe mwilende.” ²⁰ Ego gali lyoli. Husababu yakutowiteshe hwabho bhadumule, lakini awe wahemeleye shinza husababu yelweteho lwaho. Ugaje hwise bhelele umwene huhaliyamwanya sana, heli ogopaga. ²¹ Kwa maana nkashile Ongolobhe hagagalesheye amasamba amakolo, sagabhahusajile nawe shesho. ²² Hwiyenye, basi, amadala amiza nuhali wa Ngolobhe. Na hudwemo humo, okhali wahrenzele amwanya ya Ayahudi ebho bhagwiye. Lakini nahudwemo uwamwabho, owiza wa Ngolobhe guweza amwanya yaho, nkashile obhakhale mumiza gakwe. Shoshoti nawe amanye obhatagwe hutali. ²³ Natele, nkashile sagabhezehwendelele mlweteshelo lyakwe, bhezatotwe natele. Maana Ongolobhe alinagwo ouwezo ogwa totele natele. ²⁴ Hwa huje amwekashile mwadumulwe hwoze ashilile huhale omzeituni ogwamwipoli, na kinyume shakwe ehale mwa vyalilwe mu mzeituni omwieza, sehuje hwenje sana hwebha Ayahudi, sawa nahuje masamba amakolo gowezya agavyale natele muhati ye mzeituni gabho bhebho? ²⁵ Hwa huje mwaholo sehwa hujje msimanye afyatane nesiri ene, huje msibhe ne eshinshi nashi asebhanye hwenyu mwemwe. Esiri ene huje okhome guifumilene na Israeli, hadi akamilisye hwa mataifa nahwayiyenza. ²⁶ Epo aIsraeli yote bhahiwokoha, nashi

sagasimbilwe afume: “Afume hu Sayuni ayihwenza Owakhokole. Ayihwefya oubhibhi afume hwa Yakobo. ²⁷ Neli lyayibha malagano gane pandwemo nabhene, ensiku ezyo naihwebye embibhi zyaabho.” ²⁸ Ahusuhudwemo humo ashilile iizuu, bhavitiwa hwu sababu yenyu. Hudwemo ohwamwabho ashilile nasalule hwa Ngolobhe, bhagenwe husababu ya amaamaa. ²⁹ Hwa huje ezawadi nakwiziwe hwa Ngolobhe sagahugaluhana. ³⁰ Hwa huje ehale amwee mwalimleshile Ongolobhe, lakini esalezi muiposheye ewene hwusababu ya aleshe hwabho. ³¹ Hwidala lyelyo esalezi, ebha Ayahudi bhaleshile. Afumilane nego huuje nesanjilo zya mlinazyo amwe bhawezizye bhope aposhele ewene. ³² Maana Ongolobhe abhankonjele abhantu woti ashilile huleshe, huje awezizye abhasajile bhoti. ³³ Shahuhweli outabhalo nenshinshi nenjele eya Ngolobhe! Zagapimwapimwa naloonye hwakwe, namadala gakwe sagazimanyiha! ³⁴ “Maana yonanu walimenye ilengo lya Gosi? Au yonanu waliyanzi wakwe? ³⁵ Au yonanu owakwanza hupele ahantu Ongolobhe, huje alipwe nantele?” ³⁶ Hwa huje afume hwakwe, nahwidala lyakwe nahwamwene, evitu vyoti vihweli. Hwa mwene obhe golonsu wilawila. Amina.

Ulyango 12

¹ Eshi hwego embasunda, mwaholo, hwasanjilo zyakwe Ongolobhe, gafumii amabele

genyu ebhe dhabihu yeli enyomi, ezelu humwoyo yeposhelelwa hwa Ngolobhe. Ene ibada yenyu eye lyoli. ² Wala mgajehwazizye amambo gepa pansu epa, huje tugaluzanyiwe abhehwe bhapyo esebho zyetu. Bhombaji eshi mposhele amanye olugano lwa Ngolobhe gagali miza, agahukhodele na humalishilo. ³ Eshi eyanga, hwusababu yewene yepebhilwe, huje kila muntu wahweli pandwemo namwe sahwaziwa asebhe natele humwanya yakwe yuyo ashile sashihwaziwa asebhe. Huje, hahahwaziwa asebhaje hwunshinshi huje nashi Ongolobhe abhapiye kila omo hashe ahantu hee lweteho. ⁴ Hwa huje tine vintu vinji ashilile mbele gumo, lakini sevintu vyoti vine mbombo emo. ⁵ Shesho ate, tetilibhinji tilibele gumo ashilile uKilisiti, na evikhatazizyo kila omo hwawa mwabho. ⁶ Tiline kalama zyezili mjinjinyinji hwuwene yetipewilwe. Kebhabhe kalama eyamuntu okuwa, na ebhombeshe hwuwezo gwe lweteho lwakwe. ⁷ Kebhabhe ekalama ya muntu huduma, na abhombaje. Nkebhahe owenje ane kalama eyafundizye, hwa huje afudizyaje. ⁸ Nkebhabhe kalama eyamuntu falaja, hwa huje, abhafaliji. Nkebhabhe kalama eyamuntu hufumwe, abhombaje esho humwoyo gwoti. Nkebhabhe kalama ya muntu hulongozye, nalibhobheshe huwinza. Nkebhabhe ekalama ya mntu hubhoneshe esajilo, na ebhombeshe huhuseshelelo. ⁹ Aganane husibhe hwilenga. Vitwaji embibhi; mnkhatilile aminza. ¹⁰ Ahusu aganane hwaholo, mgananaje mwemwe hwa mwemwe.

Ahusu nshinshi, enshinshi ebhehulimwe hwa hulimwe mubhene. ¹¹ Ahusu ubhomvi, mganjebhe bhayuzu. Ahusu ompepo, mbhanje muhusogwa. Ahusu Ogosi, hwitumaji. ¹² Shanji hwidandi lyamlinalyo ahusu ensiku zyezihwenza. Mubhe nagolele ashilile amayemba genyu. Mkhajaje apuute. ¹³ Mubhavaje ashile amashida agalokole. Azaji idala elya bhoneshe oluganano. ¹⁴ Bhalabhilaji aminza woti bhabha bhayevya amwe; mubhaputilaye aminza na mgaje bhaputile alogwe. ¹⁵ Shanji pandwemo nabhabha shaa, lilaji pandwemo nabhabha lila. ¹⁶ Mubhe nesebho zimo mwemwe hwa mwemwe mgajesebhe hwa hwilole, lakini bhete haji abhantu abhehali eyapansi. Mubhanje nenshinshi humwanya yesebho zenyu mbhene. ¹⁷ Msihusovye omuntu wowoti ibhibhi hwi bhhibhi. Bhombaji aminza humaso gabhantu bhoti. ¹⁸ Nkashile ewezehana, nashi sashibhe shelwe hulimwi, mubhe neluseshele nabhantu bhoti. ¹⁹ Bheluganano, ugajelipizye eshisasi umwene, lakini ileshi ehasila ya Ngolobhe. Huje eyandihwe, "eshisasi sha Ngolobhe; Nene embasombe, ayanga Ugosi." ²⁰ "Lakini nkashile obhibhi waho ane zala, pele. Nkashile ayomele, mwelezye. Huje nkobhombo esho, ubhahumwoholele amakala age mwoto amwanya yitwe lyakwe." ²¹ Ogaje mwemwe nuubhibhi, heli oumene au bhhibhi hwuminza.

Ulyango 13

¹ Kila nafsi naibhe nahwishe hwa bhabhali pamwanya, hwahuje nomoo awemelelele

hwahuje efumile hwa Ngolobhe. Ne mamlaka zyezihweli zibhehwelwe no Ngolobhe. ² Hwola waikhana emamlaka eyo akhana ndapizyo zya Ngolobhe; na bhala bhabhayikhana bhenzeyi-poshele aloongwe humwanya yabho bhebho. ³ Hwa huje alongozi sebhatizizya hwabhala bhabhabhomba aminza, huje hwabhala bhabhabhomba embibhi. Huje oziliha kutohwogope abhe mamlaka? Bhombaga gagali miza, na bhenze huntufyee hwego. ⁴ Hwa huje ulitumwa wa Ngolobhe waho hwaajili yemiza. Nkashile obhabhombe gagali mabhibhi, ogopa; hwa huje sagabeba ipanga bila sababu. Hwa huje ulitumwa wa Ngolobhe, owalipe eshasi hwikuni humwanya yola wabhomba embibhi. ⁵ Hwe lyo ohwaziwa ahwiyishe, sehwisababu yekuni, huje nahwe sababu yesebho. ⁶ Hwaajili yega olipa ekodi. Hwa huje bhebhaline mamlaka bhatumwa bha Ngolobhe, ebho bhabha hwedelesha abhombe embombo ene. ⁷ Bhapeli kila omo hala habhadayi: nkakodi hwu kodi; nkaushuli hwaziwa ushulu; nkawoga uwaziwa waaga; nkanshinshi ehwaziwa nshinshi. ⁸ Mgajedaiwe no mutu ahantu hoti, hahahwaziwa oluganano mwemwe hwa mwemwe. Hwa huje olawagene oparamani wakwe amalile ikalata. ⁹ Hwa huje, “Sagaobhabhombe umalaya, sagaobhagoje, sagaobhawibhe, sagaobhazilishe,” na kashile ehweli endajizo eyamwabho yope, emanyishe ashilile eli: “Obhahugane oparamani waho nashi wewe umwene.” ¹⁰ OLugano sagabhibhi hwa paramani hwa muntu. Hwelyo ulugano malishilo

hwe nkalata. ¹¹ Hwu sababu yeli, mmenye uwakati, huje hufishile wakati wafume muntulo. Huje olokole wetu ufishile papepe nu wakati wula owelweteshelo olwewandilo. ¹² Nusiku hwendeleye, nusanya upalamiye. Tibheshe ashenje amadala agenkisi, tikwate esilaha ezye lukhozyo. ¹³ Nativalaje shinza shinza, nashi mlukhozyo saganashi eshikulukulu eshembibhi nashi akholwe. Natigajebhale humbibhi nashi azilische saga ugawezya aimale, nashi ashilile uwivu ne jela. ¹⁴ Huje tikwale Ogosi oYesu Kilisti, natiga jebheshe idala ashilile obele, huzilisyo zyakwe.

Ulyango 14

¹ Poshelaji wowoti olaobhinu hwelweteho, mganje huloonje ahusu esebho zyakwe. ² Omuntu omo ali nulweteho ogwalye hohoti, uwamwabho ono yizu alya enyanyu zyene. ³ Omntu walyakila hantu aganje humwisije ola wasagalya kila hantu. Nula wasagalya kila hantu asiloonje owamwabho walyakila hantu. Hwa huje Ongolobhe tayali aposheye. ⁴ Awe we nanu, awe hwohuloonga otumwa wa muntu owenje? Ila hwagosi wakwe huje ahwemelela au agwa. Lakini abhabhosehwe, hwa huje Ogosi awezya hubhombele huje ayemelele. ⁵ Omuntu omo alimwene isiku limo siyo elya mwabho. Owa mwabho alola ensiku zytizili sawasawa. Eshi kila muntu ahwizilisye hu njele zyakwe mwene. ⁶ Ola wakhata insiku, akhata hwaajili ya Gosi. Hwa huje ahupela Ongolobhe asalifye.

Ola wasagalya ahwiziga kutoalye hwaajili ya Gosi. Wope afumwa asalifye hwa Ngolobhe. ⁷ Hwa huje numo wakhala hwu nafsi yakwe, na numo omwinza hwaajili yamwene yuyo. ⁸ Hwa huje nkashile tihwizya, tihwizya hwaajili ya Gosi. Nakashile fifwa fifua hwaajili ya Gosi. Huje nkashile tihwizya au tifwa tilimali ya Gosi. ⁹ Hwa huje hwunsini eli uKilisti afwiye nahwizye nantele, huje abhe Gosi wabhoti abhafwe na bhabha hwendelela ahwizye. ¹⁰ Lakini awe, huyenu ohuloonga oholo waho? Nawe huyenu ohumwisha oholo waho? Hwa huje ateteti tihwemelela hwitagalila elitengelya loogwe elya Ngolobhe. ¹¹ Hwa huje lisimbilwe, “Nashi seh wizya,” ayanga Ogosi, “Hulini kila lifugamo lyaifugamila nakashile melee lwaifumwa atofye hwa Ngolobhe.” ¹² Huje bhasi, kila omo wetu aifumwa abhazye hwakwe mwene hwa Ngolobhe. ¹³ Hwegoo, tisiyendelele natele aloongane, lakini badala yakwe aamula sanyona, huje numo wabhabheshe eshikwanzo au otego hwaholo wakwe. ¹⁴ Na emenye na esogwelwe hwa Gosi oYesu, huje nahamo ahantu hahali nanjisi hene. Nihwayuyo tu ahwisebhanya huje hohoti najisi, hwa huje hwa mwene lyoli najinsi. ¹⁵ Nkashile hwusababu yeshalye oholo waho azugumila, sagaojena natele mwidala lye lukanano. Osinakanye hweshalye shaho omuntu hwaajili yakwe oKilisiti afwiye. ¹⁶ Hwesho mgaje hweteshela amadala genyu aminza gasababisye abhantu abhashente. ¹⁷ Hwa huje umwene owa Ngolobhe sehwaajili yefyalye

nevyamwele, huje hwaajili yelyoli, olweteho nesogwe ashilile Opepo Ofinjile. ¹⁸ Hwa huje ola wahutumishila uKilisiti hwidala eli ayeteshelwe hwa Ngolobhe na ayeteshelwe hwa bhantu. ¹⁹ Hwa huje bhasi, natibhale humambo gelweteho neega gegahuzenga omuntu nuwamwabho. ²⁰ Usinankanye embombo ya Ngolobhe hwusababu yeshalye. Evintu vyoti hwahuje vinza, lakini vibhibhi hwa muntu ola walya vihusababisha yuyo abumele. ²¹ Shinza kutolye enyama, wala amwele edivai, wala hohoti hweho oholo waho hahuvisya. ²² Ezyo zyelweteho natele zyohi nazyo, zibheshe awe umwene nu Ngolobhe. Anutabhala ola wasahwilonga mwene nashi hala haheteshela afume humwoyo. ²³ Wali newasiwasi aloogwilwe nkashile alya, hwusababu sagashifumilana ne lweteho. Na hohonti hesahafumilana ne lweteho, nahohonti hesahafumilana ne lweteho ezyo mbibhi.

Ulyango 15

¹ Eshi atee tetili nedadi tihwaziwa ahweje ulembezu wabhala alembezu, satihwaziwa ahwilole tete. ² Kila omo wetu asogwaje upalmani wakwe hweli ega minza, hwidala lya hulengange. ³ Hata oyo Kilisiti saga ahwilolaga yuyo mwene. Hwa huje alinashi sagasimbilwe, “Esnundo zyabhala bhabhalijile ganajile nene.” ⁴ Hwa hohonti hahatagaliye asimbe, hasimbilwe hwutilogozye, hwa huje

ashilile ajimbe naashilile apelwe umwoyo nendajizyo angatili nelyomi. ⁵ Eshi Ongolobhe umwene wajimbe nawatipele omwoyo naabhapele abhe nensebho sawa nahwakila omo alengane nu Yesu uKilisti. ⁶ Awezizye abhombeshi husebho emo muwezye humwinyile hwiilomu limo Ongolobhe nu baada hwa Gosi wetu uYesu Kilisti. ⁷ Hweeli posheli kila oomo, nashishila uKilisti nabhaposheye, hwatafi hwa Ngolobhe. ⁸ Huje eyanga huje uKilisti abhehwelwe tumwahwa tohala hwidala elilyoli hwa Ngolobhe. Abhombeshi huje awezye abhonesye endajizyo zye zyafumile hwa madaada, ⁹ na hwa mataifa humwembe Ongolobhe hhuwenee yakwe. Nashi salyandihwe, hwa huje embafumwe esifa huliwe nalengane nabhe mataifa nahwembe esifa ashilile itawa lyakwe.” ¹⁰ Nantele eyanga, “Shanji, amwee mubhatu bhemataifa, pandwemo na bhantu bhakwe.” ¹¹ Nantele, “Mtofyaje Ogosi, amwee mmataifa mwetileshi bhemataifa; goti bamwinulaje umwe.” ¹² Nantele oIsaya ayanga, “Hwaibha izii elya Yese, na oomo aibhomba atabhale amwanya yemataifa. Amataifa bhaibha nulusobhelo ashilile omwene.” ¹³ Eshi Ongolobhe owe sobhezyo abhamemwe nashee hwoti nulwete hwa mweteshele, huje muwezye aholejele ashilile esobhezyo, hwidandi elya Ompepo Ofinjile. ¹⁴ Nene nimwene evutililwe namwe, mwaholo bhane. Evutililwe namwe mmemile uwinza, mmemile enjele zyonti. Evutililwe huje amwe muwenza apelane kila oomo nuwamwabho. ¹⁵ Lakini ewandiha

hwelyomi nsini hulimwi humwanya yemambo gagahweli huje ebhakomboshe nantele, hus-ababu yeshipawa shepewilwe nu Ngolobhe. ¹⁶ Eshipawa eshishali huje embetumwa wa Yesu Kilisti watumwilwe hwa mataifa, ahwifumwe nashi oodimi we bhangili lya Ngolobhe. Nezagawezye abhombe eshi ahwifumwe hwane hwa-mataifa hubhe hukondelwe, nahubhehwelwe hu Ngolobhe hwidala lya Opepo Ofinjile. ¹⁷ Huje ashee hwane huli mwidala lya Kilisti nu Yesu nashilile hwa Ngolobhe. ¹⁸ Huje sembwez-ize alombelele wala ayanje lyolyonti huje uK-ilisti andengenye ashilile hwane ahwishe hwa mataifa. Eega amambo gamalishe hwizuu nidala, ¹⁹ hwilyomi ololesyo wemagosi, nahwily-omi elya Ompepo Ufinjile. Eli lyali hufume hu Yelusalemu, na zyogolele ohutali nashi iliriko, ebwezye ahweje hwoze humalisho wibhangili lya Kilisti. ²⁰ Hwidala eli, esebhozyane elilum-belele ibhagili, lakini sepala uKilisti pamany-ische hwitawa, huje esiwezye azenje pamwanya yesingi gwa muntu owamwabho. ²¹ Nashi sagasimbilwe: “Eebho hwamwene sebhali na-lyolyoti lyamwene ahenzele bhaihulola, nab-hala bhasagabhamwovwezye bhenzehumanye.” ²² Hweli naliezigwilwe marahaminji ahwenze mwenyu. ²³ Lakini esalezi, sendinesehemu yoy-oti ashile amikoa eгаа, naendiieziliha hwumaha minji ahweze hwulimwi. ²⁴ Huje mara zyoti nkembale Hispania etegemela abhalole nkeshile, etwalwe hwidala lyane namwe, baada yasogwe akhale namwe humdaa. ²⁵ Lakini esalezi embala hu Yelusalemu abhalishe aumini. ²⁶ Maana

bhasogwelwe abhantu bha hu Makedonia na bha hu Akaya abhombe osanguzi welyoli hwabhala bhabhasagali nahantu bhamobhamo mwaumini ohwo hu Yeslusalemu. ²⁷ Lyoli, lwalilugano lwabho, nalyoli bhalinebha madeni gabho. Maana nkashile amataifa bhashilikile ashilile amambo gabho age mpepo, bhanamadeni bhope natele nabhalishe evitu vyesagabhali navyo. ²⁸ Eshi, natele amalezeyeze evi nabhene nay-erane humandodo ega hwabhene, anenaibhala mwidala padwemo namwee ooho hu Hispania. ²⁹ Emenye huje, nantele nkenenze hulimwi, nai-hweza ekamilishe hwuwinji wa Kilisti. ³⁰ Esalezi embasunda, bhaholo, hwa Gosi wetu uYesu Kilisiti, nahwigane lya Umpepo, huje mubhe padwemo nane ashirile apute hwenyu hwa Ngolobhe hwa ajili yalini. ³¹ Putaji huje epone afume hwa bhene bhasaga bhane nshinshi ashilile hu Yudea, na huje embombo yane ohwo hu Yelusalemu ewezye aposhelelwe nalokole. ³² Putaji huje engenza hulimwi seshiye ashilile huwinza wa Ngolobhe, na huje embepadwemo namwe, embwezye antoye. ³³ Nu Ngolobhe owewene abhe padwemo namwe mwentii. Amina.

Ulyango 16

¹ Eembapela hulimwi o Fibi oilombo wenyu, oyoo tumwa webhanza lyelili ohwo Kenkrea, ² ili huje muwezizye huposhele ashilile hwa Gosi. Bhombaji eshi ashilile itawa elye tabhalo elyabhoziwa, na mwemelele padwemo nu mwene ashilile lyolyoti lyabhabhe hwanza

umwene. Maana umwene yuyo aalintumwa wa bhinji, nahwaajili yalini nemwene. ³ Mlamshe Priska nu Akila, wabhomba embombo nane ashilile uKilisiti uYesu, ⁴ ebhoo hutubhalo yane bhahandilefwe na huntabhalo yabho bhene. Na efumiya asalifwe hwabhene, nasaga nene nimwene, nahwabhala humabhanza goti age mataifa. ⁵ Lilamshi ibhanza lyalili mnyumba yabho. Lamshi Epanieto omwinza wane, oyowepapwe wahwade hwa Kilisti ashilile hu Asia. ⁶ Lamshe u Maliamu abhombile embombo hwilyomi hwaajili yalimwii. ⁷ Mlamshe Androniko nu Yunia, bhamwetu, nabhabhapinyilwe padwemo nane. Nabhapapepe padwemo natumwa, bhabhatagaliye humanye uKilisti sesele aane. ⁸ Mlamshe Ampliato, omwinza wane ashilile Ogosi. ⁹ Mlamshe Urbano, ubhomba mbombo padwemo nane ashilile uKilisti nu Stakisi omwinza wane. ¹⁰ Mlamshe Apele, umwene ahweteshelwa ashile uKilistii. Bhalamshi bhoti bhabhali mnyumba ya Aristobulo. ¹¹ Mndamshile Helodioni, ono wa mwentu. Mndamshile bhoti bhabhali mnyumba ya Narkiso, bhabha hweli ashilile Ogosi. ¹² Mndamshile Trifaina nu Trifosa, bhabhabhomba eembombo hwilyomi ashilile Ogosi. mlamshe Persisi omwinza wabhombile embombo shinza hwa Gosi, ¹³ Mndamshile o Rufo, wasalulilwe ashilile Ogosi inunyina wakwe nu walini. ¹⁴ Mlamshe Asinkrito, Flegoni, Herime, Patroba, Herima, na hola bhoti bhabhali padwemo nabhene. ¹⁵ Nisalimie Filologo na Yulia, Nerea na dada yake, na Olimpa, na waumini wote walio pamoja

nao. ¹⁶ Mndamshile omoomo hubusu ifinjile. Amabhanza goti ashilile uKilisti gabhalamhaa. ¹⁷ Salezi embasunda, mwaholo, asebhanye amwanya yebho bhabhasababisha anyapane nyapane nazijilwe. Bhabhala shenje nendajizyo zyebhalajiziwe. Galushi mfume hwa bhene. ¹⁸ Hwa huje abhantu nashebha sebhatumwa bha Kilisiti Ogosi, bhalisha amavyanda gabho bhebho. Hunogwa zybho enyololo nasalifye hwilega bhabhakhopela omoyo gasaga galogwe. ¹⁹ Hweli elenjesya hunshinshi yenyu muhufishila kila omo. Huje, esoywelwe humwanya yenyu, lakini embaza aamwe mubhenagolele ashilile na minza, namgajebhe nalogwe hwitagalila lye mbibhi. ²⁰ Ongolobhe owewinza sagabhakhale hugoje usyetano pansi yenyayo zyenyu. Ewene eya Gosi uYesu Kilisti ebhe padwemo namwe. ²¹ Timotheo, obhomba mbombo nane, abhalamha nu Lukio, Yasoni nu Sospeter, bhamwetu bhane. ²² Nene, Tertio, nahan-dishe ikalata elii, embalamuha ashilile itawa lya Gosi. ²³ Gayo, aandelile nahwibhanza lyoti, libhalamhaa. Erasto, wakhata evintu vye shijiji, abhalamhaa, padwemo nu Kwarto wali holo. ²⁴ * ²⁵ Esalezi hwamwene yuyo wali nikhone agabhomba huje mwemelele alengane ne bhangili namamanyisizyo ya Yesu Kilisti, alengane nalolesewe husili yefisilwe humaham-inji, ²⁶ lakini esalezi gamaliske nagaloleshe nab-

* **Ulyango 16:24** Zingatia: Katika nakala halisi za kwanza, mstari huu haupo. Tazama Warumi 16: 20. "Ewenee ya Gosi uYesu Kilisti ekhale namwe mweti. Amina."

hehwe apazelu nagagasimbilwe nakhohwa alen-
gane nadame hwa Ngolobhe uwewilawila hun-
shinshi eyelweteho lumo lwebhamataifa goti?
²⁷ Hwa Ngolobhe mwene uwe nshinshi, ashilile
uYesu Kilisti, hubhe neutukufu ugwe wilawila
yoti. Amina

Biblia Takatifu
The New Testament in the Safwa language of
Tanzania

Agano Jipya katika lugha ya Safwa ya Tanzania

copyright © 2020 Door43 Worldwide Mission Community

Language: Kisafwa (Safwa)

Translation by: Door43 Worldwide Mission Community

Contributor: James, Mahanji, Malila, and Safwa

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-11-06

PDF generated using Haiola and XeLaTeX on 22 Feb 2024 from source files dated 31 Aug 2023

e2f39c47-1272-5521-9829-9f00f27533b5